



ODBOR ZA ROME PRI VIJEĆU MINISTARA BOSNE I HERCEGOVINE

IZVJEŠTAJ

**O RADU ODBORA ZA ROME PRI VIJEĆU MINISTARA BOSNE I HERCEGOVINE
ZA PERIOD JANUAR 2015. – DECEMBAR 2015. GODINE**

1.UVOD

Odbor za Rome pri Vijeću ministara Bosne i Hercegovine osnovan je s ciljem poboljšanja zaštite romske manjine u BiH. Odbor za Rome je savjetodavno i koordinirajuće tijelo Vijeća ministara BiH i kao takav postoji od 2002. godine.

Prvi saziv Odbora za Rome pri Vijeću ministara Bosne i Hercegovine imenovan je na osnovu zaključka Vijeća Ministara BiH sa 70-te sjednice održane 13.6.2002. godine.

Drugi saziv imenovan je Odlukom o imenovanju Odbora za Rome pri Vijeću ministara Bosne i Hercegovine na 27 sjednici Vijeća Ministara BiH, održanoj u novembru 2007. godine („Službeni glasnik BiH”, br. 99/07) na mandat od četiri godine.

Treći saziv je imenovalo Vijeće ministara BiH je na 20 sjednici održanoj 18.9.2012. godine donoseći tom prilikom i Odluku o formiranju Odbora za Rome pri Vijeću ministara BiH i Odluku o imenovanju članova Odbora („ Službeni glasnik BiH“, broj: 85/12) od 25.10.2012. godine. Odlukama su, pored ostalog, definisane nadležnosti ovog tijela.

Odbor za Rome se sastoji od 22 člana, 11 predstavnika Roma i 11 predstavnika institucija. Po jednog predstavnika ispred institucija Bosne i Hercegovine predlažu: Ministarstvo za ljudska prava i izbjeglice Bosne i Hercegovine, Ministarstvo finansija i trezora Bosne i Hercegovine, Ministarstvo civilnih poslova Bosne i Hercegovine, Ministarstvo sigurnosti Bosne i Hercegovine, Ministarstvo pravde Bosne i Hercegovine, Direkcija za evropske integracije, Agencija za zapošljavanje Bosne i Hercegovine i Agencija za ravnopravnost polova Bosne i Hercegovine. Također, po jednog predstavnika predlažu vlade Federacije Bosne i Hercegovine, Republike Srpske i Brčko Distrikta Bosne i Hercegovine.

Članove Odbora ispred registrovanih romskih udruženja, po principu jedno udruženje jedan glas, osiguravajući ravnopravnu teritorijalnu zastupljenost predlažu romska udruženja: iz Federacije Bosne i Hercegovine šest članova i to po jedan član ispred uredno registriranih romskih udruženja sa područja Kantona Sarajevo, Zeničko-dobojskog kantona, Unsko-sanskog kantona, Tuzlanskog kantona, Srednjobosanskog kantona i Hercegovačko-neretvanskog kantona, samostalno ili u saradnji sa registriranim krovnom organizacijom; iz Republike Srpske tri člana i to po jedan član ispred uredno registriranih romskih udruženja sa područja regije Banja Luke, Doboja i Bijeljine samostalno ili u saradnji sa registriranim krovnom organizacijom; iz Brčko distrikta Bosne i Hercegovine jednog člana, te ispred Ženske romske mreže jedna članica.

2. CILJEVI I ZADACI

Odbor ima nadležnost da raspravlja o svim značajnim pitanjima sadržanim u Strategiji Bosne i Hercegovine za rješavanje problema Roma ("Službeni glasnik BiH", broj 67/05), (u daljem tekstu: Strategija) te prati provođenje i predlaže aktivnosti u svrhu efikasnije realizacije Dekade inkluzije Roma 2005-2015. godina. Konkretno, Odbor je zadužen za:

- a) sistemsko praćenje provođenja Akcionog plana za rješavanje problema Roma u oblastima zapošljavanja, stambenog zbrinjavanja i zdravstvene zaštite (u daljem tekstu: Akcioni plan) i Revidiranog plana o obrazovnim potrebama Roma u Bosni i Hercegovini;
- b) donosi operativne planove i predlaže mjere za unapređenje provođenja Akcionog plana;
- c) putem svojih predstavnika inicira aktivnosti na osiguranju sredstava u budžetima institucija na nivou Bosne i Hercegovine i entiteta za potrebe realizacije Akcionog plana;
- d) prati utrošak odobrenih sredstava u budžetima institucija Bosne i Hercegovine i institucija entiteta za realizaciju Akcionog planu u sve tri oblasti te dinamiku realizacije istih;
- e) uključuje se u ostvarivanju kontakata sa potencijalnim donatorima i drugih zainteresovanih strana na osiguravanju sredstava za provođenje Akcionog plana;
- f) u cilju donošenja validnih stavova, zaključaka i preporuka, Odbor može, u skladu sa finansijskim mogućnostima, formirati stalne ili povremene komisije i tematsko-stručne grupe, a posebno u okviru implementacije Akcionog plana;
- g) svojim aktom utvrditi će sistem monitoringa realizacije utvrđenih planskih aktivnosti za Rome u Bosni i Hercegovini te pratiti metodologiju utroška donatorskih i budžetskih sredstava namijenjenih za realizaciju Akcionog plana.

3. NAČIN RADA

Način rada i odlučivanja Mješovite komisije uređen je Poslovníkom o radu Odbora za Rome pri Vijeću ministara BiH. Odbor razmatra materijale i akte iz djelokruga svoga rada, te donosi zaključke, preporuke i daje mišljenje o pitanjima značajnim za romsku populaciju u Bosni i Hercegovini. Odborom rukovodi predsjednica/predsjednik, predsjedava njegovim sjednicama i predstavlja ga pred organima i institucijama vlasti u BiH i u javnosti.

Zaključke, preporuke i mišljenja o pitanjima koja se raspravljaju na sjednici, Odbor donosi, odnosno usvaja, većinom glasova prisutnih članova/ica Odbora.

Stručnu i tehničku pomoć Odboru pruža Ministarstvo za ljudska prava i izbjeglice Bosne i Hercegovine, a po potrebi i druga tijela, mjerodavna za rješavanje pojedinih pitanja sadržanih u Strategiji i Akcionom planu.

4. PREGLED OPERATIVNIH AKTIVNOSTI

Vijeće ministara BiH je na 95. sjednici održanoj 20.05.2014. godine usvojilo Izvještaj o radu Odbora za Rome pri Vijeću ministara Bosne i Hercegovine za period septembar 2012. – decembar 2013. godine a na 121. sjednici održanoj 29.01.2015. godine Izvještaj o radu Odbora za Rome pri Vijeću ministara Bosne i Hercegovine za period januar – decembar 2014. godine.

U periodu januar – decembar 2015. godine Odbor za Rome pri Vijeću ministara BiH je održao šest sjednica sa konkretnim operativnim aktivnostima a od osnivanja ukupno dvadeset sjednica.

U izvještajnom periodu Odbor za Rome pri Vijeću ministara BiH se, između ostalih, bavio slijedećim značajnim pitanjima:

- Prijedlog rasporeda budžetskih sredstava za poboljšanje položaja Roma i budžetskih stavki za raspored sredstava za Odbor za Rome.
- Iznalaženje sredstava za finansiranje rada Odbora za Rome pri Vijeću ministara BiH.
- Pružanje pomoći Ministarstvu za ljudska prava i izbjeglice BiH tokom predsjedavanja Dekadom uključenja Roma 2005. – 2015.
- Sudjelovanje u radu Komisije za zapošljavanje Roma i za 2015. godinu kao ravnopravni članovi i u Komisije za razmatranje primljenih projektnih prijedloga na osnovu objavljenog Javnog poziva za prikupljanje projektnih prijedloga za rješavanje problema Roma u oblasti stambenog zbrinjavanja za 2015. godinu putem posmatrača ispred Odbora za Rome pri Vijeću ministara BiH.
- Monitoring revidiranih akcionih planova u oblastima obrazovanja, zapošljavanja, stambenog zbrinjavanja i zdravstvene zaštite.
- Transparentnost rada Odbora za Rome pri Vijeću ministara BiH.

Pored ovih aktivnosti Odbor za Rome pri Vijeću ministara BiH bavio se i ostalim aktivnostima koje su se ticale različitih inicijativa koje su upućivane ispred romskog nevladinog sektora, te Ministarstva za ljudska prava i izbjeglice BiH, a koje su implementirane u zavisnosti od nadležnosti Odbora za Rome pri Vijeću ministara BiH.

5. PREGLED OSTVARENIH REZULTATA

U navedenom periodu Odbor za Rome pri Vijeću ministara BiH je održao šest sjednica sa konkretnim operativnim aktivnostima putem kojih su ostvareni slijedeći rezultati:

- Usvojen je prvi monitoring izvještaj Odbora za Rome pri Vijeću ministara BiH o implementaciji akcionih planova (zapošljavanje, stambeno zbrinjavanje, zdravstvena zaštita i obrazovanje)
- Odbor za Rome pri Vijeću ministara BiH je kreirao i usvojio Akcioni plan za Odbor za Rome.
- Obzirom da je u 2015. godini bio predviđen budžet za pomoć romskom nevladinom sektoru Odbor je utvrdio kriterije, imenovao komisiju i u saradnji sa predstavnicima Ministarstva za ljudska prava i izbjeglice BiH implementirao javni poziv za dodjelu grant sredstava romskom nevladinom sektoru. Romske nevladine organizacije su podnosile projekte čija je tema bila usmjerena na poboljšanje obrazovanja Roma.
- Uz finansijsku podršku organizacije CARE International izrađena je brošura o radu Odbora za Rome pri Vijeću ministara BiH koja je štampana i distribuirana svim relevantnim akterima.
- Predstavnici Odbora za Rome su aktivno učestvovali u međunarodnim konferencija i sjednici Međunarodnog Upravnog komiteta Dekade uključenja Roma 2005. – 2015. koje je Ministarstvo za ljudska prava i izbjeglice BiH organizovalo povodom predsjedavanja Bosne i Hercegovine.
- Četiri člana Odbora za Rome pri Vijeću ministara BiH sudjelovala su u radu užeg Stručnog tima za monitoring Revidiranog akcionog plana za rješavanje problema Roma u oblastima zapošljavanja, stambenog zbrinjavanja i zdravstvene zaštite 2013-2016. Stručni tim je sačinio Izvještaj o provedbi Revidiranog akcionog plana za rješavanje problema Roma u oblastima zapošljavanja, stambenog zbrinjavanja i zdravstvene zaštite 2013-2016 za period 2013. i 2014. godina koji je od strane Vijeća ministara BiH usvojen 08.09.2015. godine.

- Odbor za Rome pri Vijeću ministara BiH i Ministarstvo za ljudska prava i izbjeglice BiH su pokrenuli nekoliko inicijativa vezanih za prijedlog izmjene budžetske stavke za rješavanje problema Roma u oblasti zapošljavanja, stambenog zbrinjavanja i zdravstvene zaštite koje je smanjena za 2016. godinu.
- Tokom 2015. godine Odbor za Rome pri Vijeću ministara BiH je usvojio zaključak da je potrebno izvršiti reviziju Strategije za rješavanje problema Roma, koja je usvojena 2005. godine, te je započeo pripreme aktivnosti na identifikaciji strateških ciljeva.

6. TEKUĆE AKTIVNOSTI I NAREDNI ZADACI

U narednom periodu Odbor za Rome pri Vijeću ministara BiH će imati dva osnovna zadatka:

1. Kreiranje kriterija za odabir predstavnika u Odbor za Rome pri Vijeću ministara BiH, te
2. Identifikovanje i sačinjavanje liste strateških ciljeva i prijedloga za reviziju Strategije za rješavanje problema Roma.

Pored navedenog Odbor za Rome pri Vijeću ministara BiH u 2016. godini treba da izradi kriterije za saradnju među romskim nevladinim sektorom kako bi se stekli uslovi za povlačenje IPA sredstava obezbijeđenim za projekat „Dekada uključenja Roma 2020“.

U skladu sa sačinjenim izvještajem predlaže se da Vijeće ministara BiH razmotri donošenje slijedećeg zaključka:

- 1) Usvaja se Izvještaj o radu Odbora za Rome pri Vijeću ministara Bosne i Hercegovine za period januar 2015. – decembar 2015.godine**

PREDSJEDNICA ODBORA

Indira Bajramović